

CARTA UU JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jnūhun ya. Te ndindúú rí jíin hermano yō Timoteo cátee ri carta yáha cuájeē nuū rohó hermano ñuu Corinto jeē cá candíje ró Yaā Dios, jíin núu ndíhi ríhó jéē cáyíhi ndaha Yaā Dios jeē cáyūcu ní cáhnu Acaya.

² Te cáñuhun ni rī jeē Tatá yō Yaā Dios jíin Jítóho yō Jesucristo na sáha ga yā jeē váha ríhó te sáha ya jeē coo ndeyí coo sīi ni rō.

Siquī jeē ní ndoho Pablo jnūndóho

³ Na cáhán yō jeē yóhoyo cújéhnú Yaā Dios, Yaā cúu Tátá maá Jítóho yō Jesucristo. Chi máá yá cúu Tátá yō jeē cundáhú ni yohó, te níni sáha ya jeē ndúsīi ni yō.

⁴ Chi sáha ya jeē ndúsīi ni yō siquī tāca jnūndóho ndóho yó, návāha suni cuu sáha máá yó jeē ndúsīi ni jnáhan yó jéē cándoho jnūndóho. Chi nájnūhun ni sáha ya jeē ndúsīi ni maá yó, suni súcuan sáha yó jéē ndúsīi ni i.

⁵ Chi jeē ndóho yó cuehē jnūndóho nájnūhun ni ndoho Cristo, suni súcuan níhīn yō cuehē jnūhun ndúsīi ni, sáha Cristo.

⁶ Jeē yúcuan núu cándoho ri jnūndóho te súcuan te cuu sáha ri jeē ndúsīi ni rō te quendōo vāha ga anuá rō. Te jeē sáha Yaā Dios jeē ndúsīi ni rī, suu sáha

tucu jeē ndúsī ni maá ró, te quéndōo vāha ga anuá rō. Te súcuan te nihīn rō fuerza jeē cuándeyí ni rō jíin táca jnúndóho nájnūhun cándoho ri.

⁷ Te cáñuhun ndasí ni rī jeē cúu rōhó, chi cájini rī jeē nájnūhun cándoho ró jnúndóho jíin rí, suni súcuan ndusī ni rō jíin rí sáha máá Yaā Dios.

⁸ Hermano, cácuni rī jeē na cúni rō jijnáhan ró ndese ni candoho ri ichi Asia. Chi yōhyo xeēn jnúndóho ni cajito ri, nde je yajni tuá canda ri, te ni jeni ni rī jeē cuu rī nuú.

⁹ Te síquī jeē ní cajehnde ni rī cuu rī, te yūcuan ní sáha jeē ní cajecūhun ni rī jeē ma tenuū rī maá rí chi tú jniñu ri, chi sa suhva Yaā Dios jeē nastécu ndīyí tenuū rī.

¹⁰ Chi máá yá ni scácu ruhū jijnáhan ri nuū jnúndóho xeēn jeē jé yajni cuu rī nuú, te suni súcuan scácu ya ruhū vijna. Te ñúhun ni rī jeē suni scácu tucu ya ruhū ichi núú gā.

¹¹ Te suni na chíndée ñáhán ró rúhū jijnáhan ri jeē cacān tahú rō jehē rī. Chi núu cuehē ñayuu cacān tahú jehē rī, te suni cuehē i cuu nacuatáhú jehē rī jeē ni sáha ya jeē váha ruhū.

Jeē ní cucuée Pablo quihīn de ñuu Corinto

¹² Iyó ĩn jeē sáha jeē cácusī ni rī: Chi vāha íyó ni anuá rī jeē váha ndoo te ndaā ni cajica ri nuū ñáyuu ñayíví, te víhyá gā nuū maá ró jijnáhan ró. Chi síquī jeē váha ni Yaā Dios, te ni chíndée ñáhán yá ruhū, te nasūu síquī jéē ndichí máá rí cúu jeē ní cajica ri súcuan.

¹³ Te jnūhun cátee ri nuū tāca carta rī, chi máni jeē cúu cahu ró te jecūhun ni rō cúu. Te ñúhun ni rī jeē jecūhun vāha ga ni rō,

14 nájnūhun je cájecūhun ni rō jecu. Te súcuan te cuu cusī ni rō siquī rī quiṽi ndīji Jitoho yō Jesús, nájnūhun cácusī ni rī siquī maá ró.

15 Te siquī jeē súcuan ni cucáhnū ni rī, te jeē yúcuan ní jeni ni rī jeē núu na quihín rī Macedonia te jeē rī nuū maá ró xīhna gā, návāha cusī ni rō jeē jécondēhe rí rohó úu jínu núú.

16 Chi ni jeni ni rī jeē jécondēhe rí rohó, te yāha ri quihín rī Macedonia, te jeē nándicó rí Macedonia te ndiji tucu ri nuū rō. Yūcuán na te cuu chindéé ñáhán ró ruhū jeē quihín rī ichi Judea nuú.

17 Te jeē súcuan ni jeni ni rī, ¿te á téé tu nácani vāha ni cúu ri jeē tu ní jéé rī nuū rō, chí naún? ¿A cájeni ni rō jeē cúu ri nájnūhun ñayuu ñayīṽi jéé yachī cahán jeē cuu, yūcuán na te tuú, chí naún?

18 Tuú chi máá Yaā Dios jíni yā jeē tu cáhán rī jíin ró jeē cuu, te yachī nácahán rī jeē ma cúu.

19 Chi ruhū jíin Silvano jíin Timoteo ni canacani ri jnūhun Jesucristo Sēhe Yaā Dios nuū rō jijnáhan ró. Te máá yá tu cáhán yā jeē cuu te nacahán tucu ya jeē ma cúu. Chi squícu ya jeē cahán yā.

20 Chi ndīhi jeē ni jéjnūhun Yaā Dios, squícu máá Cristo. Te jeē yúcuan cácahán yō jeē yóhoyo luu cújéhnū Yaā Dios, te cácahán yō Amén, chí ndīhi squícu Cristo Jesús.

21 Te Yaā Dios cúu jeē sáha jeē ruhū jijnáhan ri jíin rōhó jíjnáhan ró, cáhīn nīhin yó jíin Cristo, te ni sándoo ya yohó jéé cuajníñu yó núu yā.

22 Te suni ni jēhe ya Espíritu yā jeē cóndee ini anuá yō, te cúu ya nájnūhun ñn sello jeē steén jeē cúu yó séhe Yaā Dios. Te sáha Espíritu jeē iyó ndāā ni yō jeē cuāha Yaā Dios tahū yō.

²³ Te jeē ná tu jeē rī nuū rō ñuu Corinto, nájñuhun ni jeni ni rī, suu cúu siquī jeē tu ní cúní rī cuxeēn rī nuū rō jeē tu cásáha vāha ró. Te máá Yaā Dios cúu Yaā jiní jeē cahán ndaā rī. Te íyó vāha jeē na cúu rī te núu tu cáhán ndaā rī.

²⁴ Te nasūu jéē cācuni rī ndacu nīhin ri jñiñu nuū rō siquī jñuhun cācandije ró yá, chi je cáhiin nīhin ro jín jñuhun ún. Chi sa suhva cācuni rī chindéé ñáhán rí rohó jéē na cúsiñ gā ni rō.

2

¹ Núu súcuan te ni jeni ni rī jeē ma jée rī inga jínu nuū rō jín jñuhun cuxeēn rī te cucuíhyá ni rō sáha ri.

² Chi núu cucuíhyá ni rō sáha ri, ¿te ndé ñáyuu sáha jeē cusī ni maá rí? Tuá na inga ñayuu, chi máni máá rōhó, te ndese cuu te núu ni sáha ri jeē cucuíhyá ni rō.

³ Te jeē yúcuan cúu jeē ní tee ri carta un núu rō, návāha nacani ni rō siquī cuēchi ró sáha, te ma cucuíhyá ni rī sáha cuēchi ró quívī jeē rī nuū rō. Chi sa suhva sáha ró jéē cúsiñ ni rī. Te jíní vāha ri jeē núu cusī ni rī, te suni ndihī ró jíjnáhan ró cusī ni rō.

⁴ Te jeē ní tee ri carta un núu rō, te yōhyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní tée ri jeē sáha ri jeē cucuíhyá ni rō, chi sa suhva návāha cuni rō ndese yōhyo manī rī jíjn ró.

Jeē íne cáhmu ni Pablo nuū tée ni sáha cuēchi

⁵ Te jeē ní cucuíhyá ni rī ni sáha tēe jeē ni sáha cuēchi ún, te nasūu máa-ni ri, chi suni nde máá ró jíjnáhan ró ni sáha de jeē ní cacucuíhyá ni rō jecu.

Te cáhán rī jeē jecu-ni, chi tu cúní rī cuxeēn ndasí rí.

⁶ Te jíín jéē ní cacuxeēn rō nuū de ná ni candutútú ró, te jíín yúcuan-ni te ni cuu-ni.

⁷ Te vijna chi jííní ñúhún jeē cóne cáhnu ni rō nuū de, te sáha ró jéē ndúsí ni de, chi sanaa te caa ga cucuíhyá ni de, te ma ndúsí gā ni de.

⁸ Núu súcuan te cáhán ndahú rí jíín ró jijnáhan ró jéē steén tucu ró jéē iyó mání rō jíín de.

⁹ Chi jeē síquí jniñu yáha cúu jeē ní tee ri carta un núu rō, návāha coto ndee rī rohó núu cuatáhú váha ró jniñu ndácu ri nuū rō.

¹⁰ Núu súcuan te núu íne cáhnu ni rō nuū ñayuu, te suni súcuan ruhū. Chi jeē íne cáhnu ni rī nuū ñayuu núu ni sáha i cuēchi, te sáha ri súcuan síquí jeē maní rī jíín ró jíto jíínú Cristo.

¹¹ Chi cánuú cone cáhnu ni yō, chi tu cúní yō jeē nihín Satanás cuēchi síquí yō, chi je jííní vāha yó ndese ndúcú un stáhú yóhó sáha yó cuēchi.

Jeē tu ní íyo nayúú ni Pablo ini ñuu Troas

¹² Ná ni jehēn rī ñuu Troas jeē nácani ri jnūhun Jitoho yō Cristo, te vāha ni sáha ya jeē ní íyo modo jeē nácani ri jnūhun ya.

¹³ Te vēsú súcuan te tu ní íyo nayúú ni anuá rī, chi tu ní níjnáhan ri jíín hermano yō Tito. Yūcuán na te ni nacuatáhú rí nuū ñáyuu yūcuán, te cuananducú rí de ichi Macedonia.

Jnūhun jeē cujéhnu ndúú yó jíín Cristo

¹⁴ Te na cútahū yō nuū Yaā Dios, chi níni ndéca vāha ya yohó cuángoo yó jíín Cristo Jesús, te ndúú yó jíín yá jeē cujéhnu ndasí yá snāā yā poder ndihi enemigo yā. Te jéjníñu ya yohó jéē scuité núu yó

jnūhun ya tācá-ni lugar, nájñūhun jíté núu ñn xicō asñ.

¹⁵ Te cúu yó nájñūhun ñn sūje jeē jeén asñ nuū Yaā Dios sáha Cristo. Te nájñūhun jeē jinú xicō un núu ñáyuu cācu ánuá jíin núu ñáyuu jnahnū ndetū.

¹⁶ Nuū ñáyuu jnahnū ndetū chi cúu yó nájñūhun ñn xicō jeē cúu i sáha, te nuū ñáyuu cācu ánuá chi cúu yó nájñūhun ñn xicō váha jeē cótecu i sáha. Te ni ñn yó ma cánda yó sáha yó jniñu yáha, te núu ma chindéé ñáhán yá yohó.

¹⁷ Te ruhū jijnáhan ri, tu cásáha ri nájñūhun cásáha cuehē tēe jeē cánducú de nihñ de xūhun síquī jñūhun Yaā Dios. Chi sa cánacani ndaā rī jñūhun ya, chi máá Yaā Dios ni tají rúhū, te máá yá jiní jeē cánacani ndaā rī síquī jeē cá candíje ri Cristo.

Jñūhun síquī contrato jeé

3

¹ Te jeē cácahān rī súcuan, ¿te á cájeni ni rō jeē cánducú tucu ri cahān rī jeē váha ga tēe cácuu ri, chí naún? ¿Te chí jíni ñúhún jéē steén rī carta recomendación nuū rō, chí jéē cacán rī cuāha ró núu rī jijnáhan ri, nájñūhun cásáha sava i?

² Tuú chi máá-ni ró cácuu nájñūhun ñn carta recomendación rī. Te jeē ñúhun ni rī jeē ní cacandíje vāha ró ni sáha ri, suu cúu nájñūhun jeē yosó jñūhun carta un ini anuá rī. Te ndihñ ñáyuu chi nájñūhun cáhu i, cúu jeē jiní i ndese ni nasāma ró.

³ Chi máá ró cácuu nájñūhun ñn carta jeē ní tee Cristo te cáscáca ri. Te nasūu jíin tinta ni tee ya, chi sa suhva jíin Espíritu Yaā Dios, Yaā técu. Te nasūu núu tabla yuū nájñūhun ni tee ya ley yā, chi sa suhva nuū anuá ñáyuu ni tee ya.

⁴ Te cácahān rī sūcuan, chi cá cucáhnu ni rī Yaā Dios siquī jeē ni sáha Cristo.

⁵ Te nasūu jēē cájeni ni rī jeē cúu canda máá rí sáha ri jniñu ún. Chi sa suhva máá Yaā Dios sáha jeē cuu squícu ri.

⁶ Te máá yá ni sáha jeē cuu cuajniñu vāha ri siquī contrato jeé yá. Te contrato yáha tu cáhán jeē squícu yó ley jeē ní tee jíin letra, chi sa suhva jeē caca yó jíin vida jeé, suu jeē ni jéhe Espíritu yā. Chi contrato ley jeē yosó jíin letra, jnahnū ndetū ñayuu sáha. Te jeē sáha máá Espíritu cúu jeē cótecu yō ní cáni.

⁷ Te ley jenahán jeē ni jéhe ya nuū Moisés, ni yosó letra nuū tabla yuū. Te yōhyo ni kujéhu, te ni ndindēē ndasí ni sáha, te nde Moisés ndí nuū de ni sáha. Te tu ní cúu coto vāha ñayuu Israel nuū de ni sáha. Te vēsú sūcuan te cuéé-ni cuéé-ni ni ndahvā jeē ndíndēe núu de. Te núu sūcuan ni kujéhu ndasí ley jeē sáha jeē cuu ñayuu te jnahnū ndetū i,

⁸ te sa víhyá gā kujéhu ndasí gá jnūhun cotecu yō jeē jéhe Espíritu nuū yō.

⁹ Chi núu yōhyo ni kujéhu ley un jéē jnahnú ndetū ñayuu sáha, te sa víhyá gā kujéhu jnūhun jeē ndáhva Yaā Dios cuēchi yó.

¹⁰ Chi ley un jéē ní kujéhu nde saá, tuá kujéhu cuiṭi, siquī jeē kujéhu ndasí gá jnūhun Espíritu jeē iyó vijna.

¹¹ Te núu sūcuan ni kujéhu ley jeē ni íyo jecu-ni tiempo, te sa kujéhu ndasí gá jnūhun jeē coo ní cáni.

¹² Te jeē sūcuan cáñuhun ni rī, jeē yúcuan cáhīyo téyí ni rī nácani ri jnūhun yáha.

13 Chi tu cásaha ri nájnūhun ni sáha Moisés jeē ní jesi de ñn sahma nuū de, návāha tú coto ñayuu Israel ndese cuandahvā jeē ní ndindēe nuū de.

14 Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chi nájnūhun jési sahma un núu jeē níjnūní i, te tu cújiyo cuiṭi. Chi nde jeē candíje i Cristo, yūcuán na te cujiyo.

15 Te suni súcuan nde vijna núu cácahu i tutu ley Moisés, te nájnūhun jeē jési ñn sahma nuū jeē níjnūní i.

16 Te jeē násāma ini ñn ñayuu quívi i nuū maá Jítóho yō Cristo, yūcuán na te cújiyo-ni jeē jési ún.

17 Chi Jítóho yō cúu máá Espíritu. Te nuū íne Espíritu maá Jítóho yō, yūcuan cúu nuū iyó libre ñayuu jeē tuá yáhi i chīji ley jenahán.

18 Te jeē yúcuan máá yó jijnáhan yó, tuá jési nuū jeē níjnūní yō. Chi cácuu yó nájnūhun espejo jeē jéhe nduva, cúu jeē cájica ndaā yō te suu stéén ndese yōhyo luu cújéhnū máá Jítóho yō. Te máá yó tāca quívī cuanasāma yó cuanduu luu ga anuá yō nájnūhun cáa máá yá. Chi máá Jítóho yō jeē cúu ya Espíritu, súcuan sáha ya jíin yó.

4

1 Núu súcuan te tu ndínuu ni rī cánacani ri jnūhun ya. Chi síquī jeē ní cundáhú ni yā ruhū jijnáhan ri te ni jéhe ya jniñu yáha nuū rī.

2 Te tu cásaha ri jniñu néé jéé cúcanu yō sáha, ni tu cájica cuu ri jíin jnūhun ndíchí stáhú, ni tu cásama ri jnūhun Yaā Dios. Chi sa suhva cácahān rī máni jnūhun ndaā. Te súcuan te cuu cuni tāca ñáyuu ini anuá i jeē cácahān ndaā rī jító jínúū Yaā Dios.

³ Te núu íyó ñáyuu tu jécūhun ni jnūhun jnama ya yohó jeē cánacani ri, te súcuan cúu nuū máni máá ñáyuu jnahnū ndetū.

⁴ Te jeē tu cá candíje i, te máá jéxeén jeē ndácu jniñu ini ñayīvi yáha, ní jesi nuū jeē níjnūní i, návāha ma ndíndēe jnúhun Cristo ini anuá i, te ma cúni i jeē yóhoyo luu cújéhnú Cristo, Yaā jeē ínuú cáa jíin Yaā Dios.

⁵ Te jeē cánacani ri jnūhun, te nasūu jnúhun máá rí, chi sa suhva jnūhun Jitoho yō Jesucristo cánacani ri. Te máá rí chi cácuu ri mozo-ni nuū rō jijnáhan ró jéē síquī jeē maní rī jíin Jesús.

⁶ Chi ná ni sáha Yaā Dios ñayīvi te ni cahān yā jeē na cundíjin nuū néē. Te suni súcuan ni sáha ya jeē ní cundíjin nuū anuá yō jeē cájécūhun ni yō síquī Jesucristo, ndese ndíndēe núu yā, cúu jeē yóhoyo luu cújéhnú ya nájnūhun cúu Yaā Dios.

Jeē cándiquīn yō jnūhun cá candíje yó yá

⁷ Te tāca jnúhun yáha jeē yóhoyo luu cújéhnú, chi nájnūhun jeē ñúhun ini íin quīsi ñuhun. Chi cácuu yó nájnūhun quīsi ñuhun, chi tú na fuerza yō. Te jeē yúcuan cájini vāha ri jeē maá Yaā Dios cúu jeē jéhe poder síquī jnúhun yáha jeē yóhoyo luu cújéhnú, te nasūu fuerza maá rí cúu.

⁸ Te jeē yúcuan, vēsú tāca lado cájito ri jnūndóho, te tu sáha jeē ma ndúsī gā ni rī. Te vēsú cá cucuīhyá ni rī síquī jnūndóho, te cáñuhun ni rī jeē quee vāha jniñu rī.

⁹ Te vēsú cájito xeēn ñayuu ruhū, te máá yá tu stóo ya ruhū jijnáhan ri. Te vēsú cánducú i snāá i ruhū jíin jniñu sáha ri, te ma cúu.

10 Te ndé-ni cúu nuū cuángoo ri, te nájñūhun ni ndoho Jesús jeē ni jhī yā, suni súcuan cándoho ri jeē jé yajni cuu rī, návāha suni cuu stéén rī fuerza Jesús jeē técu yā ini yiqui cúñu rī.

11 Chi jeē niní cátecu rī, te tāca quívī je yajni cahni ñayuu ruhū jeē siquí Jesús. Te súcuan te cájito ñayuu jeē técu Jesús ini yiqui cúñu rī jeē cúu.

12 Núu súcuan te ruhū jijnáhan ri, níní cúu jeē jé yajni cuu rī siquí jñúhun ya, te yūcuan sáha jeē cotecu maá ró nǎ cáni jijnáhan ró.

13 Te yósó núū tútu iī: Ni candíje ri te jeē yúcuan ní cahān rī, achí. Te suni jeē cácandíje máá rí cúu jeē cánacani ri jñūhun ya.

14 Chi cájini rī jeē maá Yaā jeē ní nastécu Jitoho yō Jesús, suni súcuan nastécu yā ruhū, te sáha ya jeē ñin cáhnu ni cuiñi ndihi yó núū yā.

15 Chi tāca jñúndóho yáha cándoho ri návāha coo vāha ró jijnáhan ró. Te súcuan te cayā cuehē gā ñayuu jeē sáha ya jeē váha i. Yūcuán na te suni yōhyo cuehē i nacuatáhú i nuū Yaā Dios, te kujéhnu ga yā sáha.

16 Jeē yúcuan cúu jeē tu ndínuu ni rī, te vésú cuandihí fuerza yiqui cúñu rī, te sa suhva cuanduu fuerza gā anuá rī tāca quívī.

17 Chi jñúndóho jeē ndóho yó ñayīvi yáha, tú-ni xeēn cúu, te yachī yāha. Te sáha jeē nihín yō ñin tahū jeē kujéhnu yó nǎ cáni jeē cáa ndasí gá vésú jñúndóho ún.

18 Te tu táñúhún yó nuū tāca jñúndóho jító yó núū vijna, chi sa suhva táñúhún yó nuū tāca jéé váha jeē tu jító yó núū vijna. Chi tāca jéé jító yó núū vijna, chi yachī ndihi, te tāca jéé tu jító yó núū, chi coo nǎ cáni.

5

¹ Chi yiqui cúñu yō jeē ndeé yó ñáyīvi yáha, cúu nájnūhun ìn vehe jeē náā. Te cájini yō jeē núu na náā, te cuāha Yaā Dios ìn yiqui cúñu jeé, te suu cúu nájnūhun ìn vehe jeē coo ní cáni ichi ándiví. Te nasūú ìn vehe jeē sáha ñayuu cúu, chi jeē sáha Yaā Dios cúu.

² Te níni jēē ndeé yó vehe yáha jeē cúu yiqui cúñu yō, te cájitū ni yō sáha, chi yōhyo cúní yō jeē núcūhun yó yiqui cúñu jeé yó nde andiví.

³ Chi jeē núcūhun yó un, te ma cóo máá na anuá yō jeē náā yiqui cúñu yō yáha.

⁴ Chi níni jēē iyó gá yō ini vehe yiqui cúñu yō yáha, te jítu ni yō te cúcuíhyá ni yō. Te nasūu jēē cuní yō jeē stóo yó yiqui cúñu yō te coo máá-ni ánuá yō. Chi sa suhva cúní yō núcūhun yó jēē jeé, návāha ndahvā yiqui cúñu yō jeē náā, te coo máá jēē cótecu ní cáni.

⁵ Te Yaā Dios cúu jeē ni sáha ya jeē súcuan coo yó. Te ni jēhe ya Espíritu yā jeē cóndee ini anuá yō, te sáha Espíritu jeē iyó ndáā ni yō jeē cuáha Yaā Dios tahū yō.

⁶ Núu súcuan te níni cúu jeē cá cucáhnū ni rī. Chi cájini rī jeē níni ndeé gá rī chīji yiqui cúñu yáha, te jíca cúu ri jíin núu ndeé máá Jítóho yō.

⁷ Chi vijna chi cá candíje ri jeē iyó yá jíin rí, vésú ná tu coto ri nuū yā.

⁸ Te cá cucáhnū ni rī, chi sáha ri cuenta jeē váha ga núu na quénda ri chīji yiqui cúñu yáha te quihīn rī condee rī jíin máá Jítóho yō.

⁹ Jeē yúcuan cúu jeē cá nducú ndéyí rí sáha ri jeē cusī ni yā jíin rí, vésú núu ndeé gá rí yiqui cúñu rí chí vésú núu condee rí jíin yá.

10 Chi cánuú jéē ndihí yó cuiñi yuhu mesa Cristo jeē sándaā yā jniñu yó. Te ná ñn ná ñn yó níñin yō siquí ndese ni casáha yó, á jéē váha chí jéē neé, ná ni condee yō chíji yiqui cúñu yō.

Siquí jeē ndivicoo yó núū jnūhun manī Yaā Dios jín yó

11 Núu súcuan te cándiso Iyo ri nuū maá Jítoho yō, te jeē yúcuan ndúcú ndéyí rí scandíje ri ñayuu. Te jíní Yaā Dios jeē cáhīyo ndaā rī, te ñūhun ni rī jeē suni súcuan cájini maá ró.

12 Te nasūu jéē cánducú tucu ri cahān rī jeē váha ga tēe cácuu ri, chí sa suhva cástūhun rí jeē cuu cusñi ni rō jeē siquí rī jijnáhan ri. Te súcuan te cuu stió cuiñí rō nuū ñáyuu jeē cutéyí i siquí ndese cáa ñayuu, te tu sáha i cuenta ndese cáa ini anuá ñayuu.

13 Te va sanaa te cájeni ni rō jeē tée loco cácuu ri jeē cácahān rī súcuan. Te siquí jeē cándihvī ni rī jehē Yaā Dios cúu. Te tuú chí cáhīyo vāha xinī rī, te jeē yúcuan cájeñíñu ri jeē quéndōo vāha ró.

14 Chi siquí jeē ní cundáhú ni Cristo ruhū jijnáhan ri cúu jeē cánuú nacani ri jnūhun ya. Chi cájini vāha ri jeē ni jíhī mañúhún-ni ya jeē siquí ndihí yó, te jeē yúcuan nájnūhun ni jihī ndihí yó jín yá.

15 Chi ni jihī yā jeē siquí ndihí yó návāha tāca yó jéē técu, ma cótecu ga yō jeē sáha yó jéē cuní maá yó, chí sa suhva jeē cuní maá yá jeē ni jíhī yā te ni natecu yā jeē siquí yō.

16 Jeē yúcuan tuá casáha ri cuenta ndese-ni cándāa ñayuu, nájnūhun casáha ñayuu ñayiví. Te vēsú súcuan ni casáha ri cuenta siquí Cristo nde saá, jeē ñn tēe-ni cúu ya, te vijna chí cájini rī jeē cúu ya Sēhe Yaā Dios.

17 Chi núu ñin ñayuu yáhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndihi.

18 Te Yaā Dios cúu jeē sáha ndihi jeē yáha, chi jíin Cristo ni sáha ya jeē ní ndivícoo yó núu jnúhun manī yā jíin yó. Te ni tejníñu ya ruhū jeē cánacani ri jnúhun jeē ndivícoo ñayuu nuū jnúhun manī yā jíin i.

19 Chi jíin Cristo te ni sáha Yaā Dios jeē ñáyuu ñayivi ndivícoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejníñu ya ruhū jeē cánacani ri jnúhun yáha ndese ndivícoo i nuū jnúhun manī yā jíin i.

20 Núu súcuan te cácuu ri tēe cájica jniñu máa Cristo. Te jeē cahán rī, te nájnūhun jeē maá Yaā Dios cahán ndahú yá jíin ró. Núu súcuan te cácahān ndahú rí jíin ró jeē cahán Cristo, jeē na ndivícoo ró núu jnúhun manī Yaā Dios jíin ró.

21 Te Cristo, vēsú tú ni ñin cuēchi ya, te ni sáha Yaā Dios jeē ní nucondee cuēchi yó síquī yā. Te súcuan te yóhó jéē yáhi ndaha Cristo, ni nucondee síquī yó jeē iyó ndáā yó nájnūhun íyó ndáā Yaā Dios.

6

1 Núu súcuan te síquī jeē cácuu ri tēe casájniñu jíin yá, te cácahān ndahú rí jíin ró jeē ma stóo uun ró jnúhun jeē ni sáha Yaā Dios jeē váha róhó.

2 Chi áchí yá nuū tútu i:

Máa tiempo cuní maá rí te cuni sōho rí jnúhun cáhān ndahú ró jíin rí.

Te máa tiempo jnáma ri ñayuu, te jnama ri rohó. Achí yá. Te vijna-ni cúu máa tiempo jeē cuní yā, chi vijna-ni cúu tiempo ni quiji Yaā jnáma yóhó.

³ Te cánducú rí jeē ma sáha ri ni ñn jniñu jeē casi jeē candíje ñayuu, návāha ma cahán i síquī jniñu ndíso ri.

⁴ Chi sa suhva cánducú rí jeē ndíhi jeē sáha ri, steén jeē cácuu ri tēe cájejniñu nuū Yaā Dios. Jeē yúcuan cájendeyí ni rī jíin jéē ndóho ri jnūndóho, jíin jéē cúmanī nuū rī, jíin jéē yí sáha jíin rī.

⁵ Chi ni íyo tíjni jínu jeē ní cacani i ruhū, jeē ní cachune i ruhū vecāa, jeē ní candonda i síquī rī, jeē ní casájniñu nīhin ri, jeē ní cajehni rī mähna máá rí, jeē ní cahíyo ndite ni rī.

⁶ Te suni cánducú rí jeē cuajnúhún i ruhū síquī jeē ndoo cájica ri, te cájecūhun vāha ni rī jnūhun ndaā, te cáhíyo paciencia ni rī, te vāha ni rī, te ndéé Espíritu Santo ini rī, te cákundáhú ndije ni rī jnáhan ri.

⁷ Te cánacani ndaā rī jnūhun, te poder Yaā Dios íne jíin rí. Te jíin jnúhun ndaā cándahva rī tācá jniñu néé, chi nájnūhun jeē cájejnáhan ri síquī. Chi nájnūhun jeē ndóna un síquī rī te ndóna ri síquī.

⁸ Íyó jínu yíñúhún ñáyuu jíin rí, te íyó jínu tuú. Íyó jínu jéjnúhún i ruhū, te íyó jínu cácahān i síquī rī. Íyó jínu cácahān i jeē tēe stáhú cácuu ri, te íyó jínu cácahān i jeē tēe ndaā cácuu ri.

⁹ Íyó jínu cásáha i nájnūhun jeē tu jíin i ruhū jíjnáhan ri, te íyó jínu jeē jíin vāha i ruhū. Íyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihī rī sáha.

¹⁰ Te vēsú íyó jéē cácuuíhyá ni rī, te níiní cácusī ni rī. Te vēsú tēe ndáhú cácuu ri, te sácúcá rí cuehē ñayuu jíin jnúhun ya. Te vēsú tú na vé cánevāha ri, te jíin máá yá te ndíhi-ni cúu jeē cánevāha ri.

¹¹ Hermano ñuu Corinto, súcuan cúu jeē cácahān

cají rí jíin ró jijnáhan ró, chi siquī jeē maní rī jíin ró, jeē yúcuan cáhí ndihí ri ndese cándoho ri.

¹² Máá rí jijnáhan ri cácahān cají rí siquī jeē maní ndasí rí jíin ró, te máá ró jijnáhan ró sanaa te tu súcuan cúu.

¹³ Nájnūhun cáhān tatá jíin séhe, súcuan cáhān ndahú rí jíin ró jeē nájnūhun íyó manī rī jíin ró, súcuan na cóo manī tucu ró jíin rí.

Siquī jeē cúu yó templo Yaā Dios

¹⁴ Ma quívi nduu rō jíin jniñu néé cásáha ñayuu tu cácaandíje, chi ma cúu coo inuú ró jíin i. ¿Chi ndese cuu quijnáhan jniñu cásáha ñayuu ndaā jíin jniñu cásáha ñayuu tú ndaā? ¿Te ndese cuu coyūcú inuú ñáyuu cájica jíin luz yā jíin ñáyuu cájica nájnūhun nuū néē?

¹⁵ ¿Ndese cuu coo inuú ni Cristo jíin Satanás? ¿Te ndese cuu cuiñi cáhnu ñayuu cácaandíje jíin ñáyuu tu cácaandíje?

¹⁶ ¿Te ndese cuu quijnáhan templo Yaā Dios jíin ídolo? Chi máá ró cácuu templo Yaā Dios, Yaā técu, chi ndéé yá ini anuá rō, nájnūhun ni cahān yā: Condee rī ini i te caca cuu ri mēhñú i, te cuu ri Yaā Dios maá i, te cuu i ñayuu maá rí.

¹⁷ Te jeē yúcuan ní cahān gā yā: Ma quívi nduu rō jíin jniñu néé cásáha i, te cusín ró jijnáhan ró, áhí Jítóho yō. Te ma jnī ró tāca jéē tú ndaā. Yūcuán na te naquihin ri rohó,

¹⁸ te cuu ri Tatá rō jijnáhan ró, te cuu ró séhe yí rí jíin séhe síhí rí, áhí Jítóho yō, Yaā jnī ndihí poder.

Achí tutu.

7

¹ Núu súcuan, ñánī mánī, cánevāha yó táca jnúhun yáha jéē ni jéjnūhun ya. Jeē yúcuan na sándoo yó máá yó táca jéē sajnéhén yiquí cúñu yō jíin ánuá yō. Te na cónso íyo yó núū Yaā Dios, te coo ndoo coo íi yō nuū yā jíin ndíhi jniñu cúní yā.

Jeē ní canacani ni ñayuu Corinto siquī cuéchi i

² Coo manī rō jíin rí jijnáhan ró víi. Chi tu ní sáha ri falta nuū ní ñn ró, te tu ní stívi rí anuá ni ñn ró, te ni ñn ró tu ní stáhú rí.

³ Te nasūu jéē nducú rí cahān rī nuū rō cúu jeē cahān rī súcuan, chi je ni cahān rī jeē yóhyo manī rī jíin ró. Te níni ñūhun ni rī rohó, vēsú cuu yō chí cotecu yō.

⁴ Te cúcáhnū ndasí ni rī rohó jijnáhan ró, te cúsiñ teyí ni rī jeē siquí rō. Te vēsú cájito ri táca jnúndóho yáha, te íyó ndeyí ni rī te cúsiñ ndasí ni rī jeē siquí rō.

⁵ Ná ni jengoo ri Macedonia te tu ní íyo nayúú ni anuá rī, chi sa suhva yí ní íyo jnúndóho jíin rí táca lado. Chi ni íyo jeē ní castáhān jnáhan jíin rí, te ni cayūhu rí sanaa te caca yátá ñáyuu cá candíje.

⁶ Te Yaā Dios jeē sáha jeē ndúndeyí ni ñayuu cá cucuíhyá ni, ni sáha ya jeē ní candundeyí ni rī, chi ni quiji Tito ni sáha ya.

⁷ Te ni candusiñ ni rī, nasūu máá ñn-ni siquí jeē ní quiji de, chi suni jeē ní ndundeyí ni de ni casáha ró. Chi ni castūhún de jeē cáñuhun ni rō coto tucu ró rúhū, jíin jéē cá cucuíhyá ni rō jeē siquí cuéchi ró, jíin jéē cá nacani ni rō jehē rī. Te jeē yúcuan ní cusíñ gā ni rī.

⁸ Te carta jeē ní tají rí nuū rō, vēsú ni sáha jeē ní cacucuíhyá ni rō, te tuá nácani cuíhyá ni rī jeē ni sáha súcuan. Chi vēsú ni cucuíhyá ni rī saá, te vijna te tuá, chi jíní rī jeē jecu-ni quiṽi ni cacucuíhyá ni rō ni sáha.

⁹ Te vijna te cúsi ni rī, te nasūu síquī maá jēē ní cacucuíhyá ni rō. Chi cúsi ni rī jeē ní jejniñu jeē ní cacucuíhyá ni rō, chi ni sáha jeē ní canacani ni rō síquī cuēchi ró. Chi ni cacucuíhyá ni rō nájnūhun cúní maá Yaā Dios, te nasūu jēē ni sáhuhū rī rohó.

¹⁰ Chi núu cúcuíhyá ni yō nájnūhun cúní Yaā Dios, te suu sáha jeē nácani ni yō síquī cuēchi yó te jnama ya yohó, te ma cóo ga jeē nácani cuíhyá ni yō. Te jeē cācucuíhyá ni ñayuu tu cācandíje, tu jéjniñu jeē nácani ni i, chi sa jnahnū ndetū i.

¹¹ Te ni cacucuíhyá ni rō nájnūhun cúní Yaā Dios, te vijna te cājito ró náa vāha ni jejniñu. Chi ni canacani ndasí ni rō ni sáha, te ni canducú ró jeē quéndōo ndaā rō, te ni cacuxeēn rō nuū téē ni sáha cuēchi, te ni cayūhu ró jeē ní castívi ró núu yā. Yūcuán na te yōhyo ni cacuni rō coto tucu ró núu rī, te yōhyo ni candíhvī ni rō ni cacuxeēn rō nuū téē ni sáha cuēchi ún. Te súcuan ni castéén rō jeē tú cuēchi ró, chi tu ní cājejniñuhún ró cuēchi ni sáha tēē ún.

¹² Te jeē ní tee ri carta un, nasūu máa-ni jeē cúxeēn rī nuū téē ni sáha cuēchi ún, ni nasūu máa-ni jeē cahán rī jehē tēē ni ndoho ni sáha de. Chi sa suhva ni tee ri návāha nucūhun ni rō ndese yōhyo ni canacani ni rō jehē rī jító jínúu Yaā Dios.

¹³ Jeē yúcuan ní candusi ni rī jeē síquí ró.

Te víhyá gā ni cacusi ni rī jeē ní jini rī jeē cúsi ni Tito, chi ni nduu nayúú ini de ni casáha ró.

¹⁴ Chi je ni cahán rī jín de jeē cúsi ni rī jeē váha

ñayuu cácuu ró, te vijna te tu ní quéndōo ri jnūhun canu jeē siquí rō. Chi nájnūhun ni cajini rō jeē iyó ndáa tāca jnúhun ni cacahān rī jín ró, suni súcuan ni cundaā jnūhun ni cacahān rī jín Tito jeē cúsi ni rī siquí rō jeē váha cáscuicu ró.

¹⁵ Te víhyá gā manī de jín ró vijna jeē ñúhun ni de jeē vāha ni cajetáhú ró jeē cahán de, te ni cahīyo yíñúhún ró ni candiso iyo ró núu de.

¹⁶ Núu súcuan te cúsi ni rī siquí jeē cucáhnū ndasí ni rī rohó jíjnáhan ró.

Jeē na cúsi ni i socō i cuehē

8

¹ Hermano, vijna te suni cácuni rī castūhun rí nuū rō jijnáhan ró ndese cuehē jeē váha ni sáha Yaā Dios jín ñayuu cácandíje cáyūcú Macedonia.

² Chi vēsú yōhyo ni jito ndee jnūndóho i, te suni yōhyo ni cacusi ni i jín jnúhun ya. Te vēsú ñayuu ndahú ndasí cácuu i, te yōhyo vāha ni cajequin i cuehē xūhun jéé cúu ñayuu ndahú cácandíje.

³ Chi cúu ri testigo jeē ní cacusi ni maá i ni cajēhe i ndésaa ni canda i, te nde vihyá gā ni cajēhe i.

⁴ Chi ni cacahān ndahú ndasí i jín rí jeē na cuáha ri jnūhun chindéé ñáhán i jín yó cuāha i xūhún cuu hermano cándoho ndáhú.

⁵ Te víhyá gā ni casáha i vēsú jeē ní cajeni ni rī, chi xīhna gā ni casocō i máá i nuū Jítoho yō, te sáa te ni cajēhe i máá i sáha i tāca jéé cácuni rī, ndihi ndese nújnahan ni Yaā Dios.

⁶ Te jeē súcuan ni casáha ñayuu Macedonia, te ni castíhví ni rī Tito jeē na jéé tucu de nuū maá ró,

sáha de jeē jīnu jniñu jeē ni squéjéé de jíin ró jeē suni caquin rō cuehē xūhún cuu ñayuu ndahú.

⁷ Chi máá ró yōhyo vāha cásáha ró táca-ni, chi vāha cácandíje ró, vāha cánacani ró jnúhun, vāha cájecūhun ni rō, vāha cándihvī ni rō, vāha manī rō jíin rí jijnáhan ri. Núu súcuan te suni cánuú sáha vāha ró jniñu yáha jéé cuáha ró jéé cúu ñayuu ndahú.

⁸ Te nasūu jéé cuní rī ndacu ri jniñu nuū rō, chi sa cástūhun rí nuū rō ndese yōhyo cácusī ni sava ga ñayuu jéhe i xūhún, te súcuan te cuni rī jeē suni máá ró cákundáhú ndije ni rō ñayuu ndahú.

⁹ Chi je cájini rō ndese yōhyo vāha ni Jitoho yō Jesucristo jíin yó. Chi siquī jeē ní cundáhú ni yā rohó te ni nasáha ndáhú yá maá yá, vēsú cucá ndasí yá nde andiví núú. Te súcuan ni sáha ya jeē cá cucú cá ró ndihī jeē ndíso jnūhun ya, siquī jeē ní nasáha ndáhú yá maá yá.

¹⁰ Te jeē vāha máá ró cúu jeē na cáchi rī ndese jéni ni rī siquī jniñu yáha. Vāha ni caquejéé ró nde jendujin, chi nasūu máá-ni jeē ní cajequin rō xūhún, chi suni yōhyo ni cacusī ni rō sáha ró.

¹¹ Núu súcuan te vijna te sínu ró. Te nájnūhun ni cacusī ni rō ni caquejéé ró jíin, suni súcuan na cúsi ni rō sínu ró, chi cuāha ró núu ndese cánevāha ró.

¹² Chi núu cúsi ni yō cuāha yó, te jétáhú yá núu ndese névāha yó, chi tu jícán yā jeē cuāha yó jéé tu névāha yó.

¹³ Te nasūu jéé cahán rī jeē cáhni ndahú ró máá ró jeē cáa ga nihīn i vēsú jeē ndóo nuū maá ró.

¹⁴ Chi sa suhva jeē ñn cūhva-ni conevāha ró jíin i. Chi cánevāha cuehē rō vijna, te cuu cuāha ró jéé cúmanī nuū i. Yūcuán na te núu ndé ñn quiivī

conevāha i, te suni cuu cuāha i te núu ni cumanī nuū rō. Te súcuan te ñn cūhva-ni conevāha ró jíjnáhan ró,

15 nájnūhun cáhán tutu iī siquī ñáyuu jeē ní canastútú maná nde jenahán: Tēe jeē ní nastútú cuéhē, tu ní ndóo ga nuū de. Te tēe jeē ní nastútú jecu-ni, suni tu ní cúmanī nuū de. Achí tutu.

Jnūhun Tito jíin úū gā jnáhan de

16 Te na cútahū rī nuū Yaā Dios jeē ni sáha ya jeē ndihví ni Tito jehē rō nájnūhun cándihví ni maá rí.

17 Chi ni jetáhú de jeē ní cacahān rī jíin de jeē jeé de nuū rō. Te siquī jeē ndihví ni de jehē rō, jeē yúcuan cuájeē de, chí súcuan cúu ni maá de.

18 Te suni cátají rí ñn hermano cuajeē jíin Tito nuū rō. Te tāca grupo ñayuu cácandíje cájejnūhún i tēe un jéē váha jéjniñu de siquī jnūhun jeē jnáma ya yohó.

19 Te tāca grupo ñayuu cácandíje suni ni catee i jniñu siquī de jeē cáca de jíin rí chindéé ñáhán de quindēca de xūhun jíin rí jeē ní cajēhe ñayuu. Te jniñu yáha cásáha ri návāha cahān ñayuu jeē yóhyo vāha Yaā cúu máá Jítóho yō, chí cuni i ndese yóhyo cácusī ni rō cásocō rō xūhún.

20 Te quingoo ndindúú rí návāha ni ñn ñayuu ma tēe i cuēchi siquī rī siquī xūhun cásocō ñayuu.

21 Chi ndúcú rí jeē squícu ndaā rī tācá jniñu, nasūu máá ñn-ni nuū Yaā Dios, chí suni nuū ñáyuu.

22 Te suni cátají rí inga hermano yō cuajeē de jíin ndindúú tēe yáha. Te tijni jínu ni steén de jeē yóhyo cúsi ni de ndihví ni de tācá jniñu. Te vijna chí ndihví gā ni de jehē rō, chí cúcáhnū ndasí ni de jeē cásquícu ró.

²³ Te núu cácajnūhún ñayuu siquī Tito, te achi rō jeē cúu de tēe chindéé ñáhán jéjníñu jíin rí nuū rō siquī jnúhun ya. Te uū gā hermano yō yáha, achi rō jeē cácuu de tēe jeē ní catejníñu ñayuu cácaandíje, te cáhīyo yíñúhún de nuū Cristo.

²⁴ Núu súcuan te stéén rō nuū de jeē cáhīyo manī ndije ró jíin de, návāha na cúni tāca grupo ñayuu cácaandíje. Te súcuan cuni i jeē tu ní cácusī cāhá ni rī siquī rō.

Siquī jeē cájequin i xūhún cuu tācá hermano

9

¹ Te vijna te tuá jíni ñúhún tee ri nuū rō siquī xúhun jeē cájequin rō cuu tācá hermano cándoho ndáhú.

² Chi je jíni rī jeē cánujnahán ni rō cuāha ró. Te jeē yúcuan máni cúsi ni rī cahán rī jíin ñáyuu Macedonia jeē rohó ñáyuu Acaya, je ni casátūhva ró xúhun ndé jendujin. Te jeē súcuan ni cacusi ni maá ró, te jeē yúcuan cuehē ñayuu Macedonia ni cacondihví ni i ni cajēhe máá i.

³ Te tájí rí ndinúni hermano yáha cuájeē maá de nuū rō xīhna gā, návāha jeē jinú maá rí te ma quéndōo néé rí siquī jnúhun ni cahán rī jeē squícu vāha ró jíin jniñu ún. Chi coo tūhva ndije ró jíin xúhun nájnūhun ni cahán rī jíin i.

⁴ Chi sanaa te jecoo jecu tēe Macedonia jíin rí, te núu cuni de jeē tu cáhīyo tūhva ró, te coo jnúhun canu nuū rī, te suni nuū maá ró jijnáhan ró, chi ni cahán teyí rí jeē cáhīyo tūhva ndije ró.

⁵ Jeē yúcuan ní jeni ni rī jeē cánuú cahán rī jíin tāca hermano yáha jecoo de xīhna gā, te sáá te jinū rī, návāha stīhví ni de rōhó jéé yáchī na cóo tūhva

xūhun jéē ní cacahān rō jeē cuáha ró. Te súcuan te coo tūhva siquī jeē váha ni rō, te nasūu jéē safuerza rī rohó.

⁶ Cocuhun ni rō jnūhun yáha, jeē núu jecu-ni cuāha ró te suni jecu-ni nanihīn rō: Chi tēe jeē tihlí-ni táji, suni tíhlí-ni nastútú. Te tēe jeē táji cuehē, suni cuehē nastútú. Achí tutu.

⁷ Tācá ĩn ĩn ró cuāha ró ndésaa ni tee ni rō. Ma cúxīi ni rō cuāha ró, chi nasūu fuerza cúu. Chi Yaā Dios manī yā jīn ñáyuu jeē cúsi ni cuāha.

⁸ Te máá Yaā Dios cuu sáha ya jeē nducuehē ndīnuū jeē váha cuu ró jíjnáhan ró, návāha níni coneváha ró ndihī tācá jeē jíni ñúhún ró, te coo sobra gā jeē cuāha ró jéē cúu tācá jniñu váha.

⁹ Chi súcuan cáhán tutu ĩ siquī tāca ñáyuu jéhe: Ni scáa i ni jēhe i nuū ñáyuu ndahú.

Te tācá jniñu váha sáha i, chi quendōo ní cáni.

Achí tutu.

¹⁰ Te Yaā Dios jéhe ya tata nuū tēe táji, te nihīn de staā jeē caji de. Te suni súcuan cuāha ya ndīnuū jeē váha cuu ró, te sáha ya jeē cáyā te nducuehē jniñu váha cásáha ró.

¹¹ Súcuan cucúcá ró jīn táca-ni, návāha cuu cuāha cuehē rō. Te xūhun jéē cuáha ró quíhīn nuū hermano cándoho ndáhú, suu sáha jeē nácuatáhú i nuū Yaā Dios.

¹² Chi xūhun jéē cuáha ró núu i, nasūu máá ĩn-ni jeē nihín i jeē cúmanī nuū i, chi suni sáha jeē nácuatáhú ndasí i nuū Yaā Dios.

¹³ Te cahān i jeē yóhyo vāha Yaā cúu Yaā Dios, chi xūhun jéē ní cajēhe ró stéén jeē váha cá candíje ró jnúhun Cristo. Te suni sáha jeē cahān i jeē yóhyo cújéhnú Yaā Dios siquī jeē ní cajēhe cuehē rō nuū i jíin núu sava ga ñayuu.

14 Te suni cacān tahū i jehē rō, chi coo manī ndasí i jíin ró siquī jeē yóhyo vāha ni sāha Yaā Dios jíin ró.

15 Te na cútahū yō nuū Yaā Dios, chi ni jēhe ya Sēhe ya nuū yō, jeē cúu in tahū cáhnu ndasí jeē ma cánda cuiṭi yō castūhún ndiḥi yó.

Jeē ndíso jniñu Pablo cúu de apóstol

10

1 Te ruhū Pablo, cáhán ndahú rí jíin ró jijnáhan ró jíin modo maá Cristo jeē vītá ni yā te vāha ni yā. Ruhū, chi cácahān rō jeē iyó suchí ni rī núu ndéé rí jíin ró, te núu ndéé jíca rí te tu yúhú cuiṭi rī cahān nīhin ri jíin ró, cácahān rō.

2 Núu súcuan te cáhán ndahú rí jíin ró jeē núu na jéé rī te ma cahán rō jnūhun jeē sāha jeē cuxeēn rī nuū rō. Chi sava ró cácahān jeē casáha ri jniñu ya siquī jeē máni jeē na níhín rī siquī ún. Núu súcuan te íyó túhva ri cuxeēn rī nuū ñayuu cácahān súcuan.

3 Chi vēsú cácuu ri ñayuu cáyūcú ini ñayīví, te tu cájejnáhan ri modo cájejnáhan ñayuu ñayīví. Chi nájnūhun jeē cájejnáhan ri siquī tāca jniñu neé.

4 Chi nasūú ndajniñu ñayīví jéjniñu ri cájejnáhan ri, chi jíin poder Yaā Dios cájejnáhan ri snāā rī tāca fuerza jeē cúu contra siquī yā.

5 Súcuan cásnāā rī tāca jnúhun ndúxí jíin jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi ri nuū ndiḥi jeē tú vāha jeē cájeni ni ñayuu, návāha cuandetū i nuū Cristo.

6 Te jeē jínu cuandetū vāha máá ró, yūcuán na te coo túhva ri cuāha ri castigo nuū tāca gá ñayuu jeē tu cájendetū.

⁷ Máá ró jijnáhan ró máni cájeni ni rō modo ñayuu tu cájecūhun ni. Núu na-ni tēe jēni ni de jeē Cristo ni tejniñu ya de, te na sáha de cuenta jeē suni súcuan ni tejniñu ya ruhū jijnáhan ri.

⁸ Te núu ni cahān teyí rí jín ró jeē ndíso jniñu ri, te tu cúcanu rī sáha. Chi máá Jítóho yō ni tejniñu ya ruhū jijnáhan ri, návāha sáha ri jeē ije ánuá rō jín jnúhun ya, nasūu jēē snāā rī.

⁹ Núu súcuan te tu cúní rī jeē cáni ni rō jeē nducú rí siúhú rí rohó jín carta rī.

¹⁰ Chi cácahān sava ró jēē tāca carta rī yōhyo stñhví ni te nīhin ndácu jniñu, te sa suhva núu ndéé rí jín ró te tu cūndeyí ni rī ndacu nīhin ri jniñu, te suni tu cúu cahān vāvihí rí, achí ró.

¹¹ Te ñayuu cácahān súcuan na sáha i cuenta jeē nájnūhun nīhin cáhān carta rī jeē íne jícá rí, suni súcuan nīhin ndacu ri jniñu nuū rō jeē cóndee rī jín ró.

¹² Te va ma chūndeyí cuiti ni nde ri jeē sajuhnu ri maá rí, nájnūhun cásáha sava tēe un jēē cájejnūhún nde de máá de. Tāca tēe ún chi cáacunéé de jeē cájeni ni de jeē cujuhnu ga de vēsú jnáhan de, te tu cásáha de cuenta ndese cúní Yaā Dios jeē caca de.

¹³ Te ruhū jijnáhan ri, chi cuteyí nde ri maá cūhva-ni jniñu jeē ni jēhe Yaā Dios nuū rī, te ma yáha ga rī. Máá Yaā Dios ni tee cūhva yá ndésaa cúu jeē sáha ri, te máá yá ni jēhe jnūhun jeē ni jínū rī nuū rohó ñáyuu ñuu Corinto.

¹⁴ Jeē yúcuan ná ni jinūcoo ri nuū rō jeē xihna ñúhún te nasūu jēē ni yáha ri nuū cūhva jniñu ní jēhe ya nuū rī. Chi xihna gā maá rí ni jinūcoo nuū rō ni canacani ri jnūhun vāha Cristo.

¹⁵ Te tu cácuteyí rí siquī jniñu ní casáha inga

tēe, nájñūhun jeē jñíñu máá rí cúu. Chi sa suhva cáñuhun ni rī jeē cuehē gā candíje ró, te súcuan te cuu sáha ri cuehē gā jñíñu ya mēhñu ró, te níní máá cúhva jeē ni jéhe ya nuū rī.

¹⁶ Yūcuán na te cácuñi rī scuité núu ga rī jñūhun jnáma ya yohó núū tāca gá ñuu yúcu ndé yūcuan gá. Te súcuan te ma quívi nduu rī cutéyí rí nuū jeē jé ni canacani inga tēe jñūhun.

¹⁷ Te núu ndé tēe cúñí de cutéyí de, na cutéyí de síquī jeē sáha máá Jítóho yō, nasūu síquī jēē sáha máá de.

¹⁸ Chi nasūu tēe jeē jejnúhún máá cúu jeē quéndōo yíñúhún, chi sa suhva tēe jeē jejnúhún máá yá.

Jeē cahán Pablo síquī tēe cánacani jñūhun stáhú

11

¹ Cone cáhnu ni rō jijnáhan ró jeē cahán rī jecu jñūhun modo nájñūhun cácahān ñayuu canéé. Núu súcuan te cáhnu coo ni rō víi.

² Chi cúcuíñí rí jehē rō jijnáhan ró, nájñūhun cúcuíñí Yaā Dios. Chi cácuu ró nájñūhun ññ sūchi síhí íyó ndoo, te ni sáha ri jeē quijnáhan ró jíñ Cristo, nájñūhun quijnáhan ññ sūchi síhí jíñ máñúhún-ni yíi i.

³ Te yúhú rí sanaa te cuāha ro jnúhun stáhú táca tēe un róhó, te siáá rō jñūhun jeē chiñúhún ndāā rō Cristo nde jíñ ini jíñ ánuá rō. Chi suni súcuan ni sáha Satanás jíñ Eva, chi ni quívi ini ññ coō, te ni stahú un ña jíñ jnúhun ndíchí stáhú.

⁴ Chi núu quíjicoo tēe nuū rō jeē tu cánacani ndāā de jñūhun Jesús nájñūhun ni canacani ri nuū rō, te va yōhyo vāha cájetáhú nde ró de. Te suni súcuan

vāha cájetáhú nde ró núū ñnga espíritu jíin núū ñnga jnūhun jeē tu quíjnáhan jíin Espíritu jíin jnúhun jeē ní cacandíje ró jéē jnáma ya rohó.

⁵ Te tāca téē cacandíje ró un jéē cácahān jeē apóstol kujéhnū ga cácuu, tú cuítī jeē kujéhnū ga nde de nuū rī.

⁶ Chi vēsú tu níhín vāha nde ri modo cahān rī, te jécūhun vāha ni rī. Chi jíin ndihī jniñu ni casáha ri mēhñu ró ni castéén cají rí nuū rō jeē súcuan cúu.

⁷ Tu ní jícán rī xūhun núū rō síquī jeē ní nacani ri jnūhun jnáma ya yohó. Te súcuan ni cotecu ndahú rí návāha quendōo vāha ga maá ró jíin jnúhun ya. ¿Te va cuēchi ni sáha ri jeē ni sáha ri súcuan, chí naún?

⁸ Chi sava ga grupo ñayuu cacandíje ni quihin ri xūhun jéē ní cajēhe i nuū rī, návāha súcuan-ni nacani ri jnūhun ya nuū rō jijnáhan ró.

⁹ Te ná ni condee rī jíin ró te ni ndihī xūhun rí, te tu ní jícán cuítī rī nuū ní ñn ró. Chi hermano jeē ní quijicoo ichi Macedonia ni cajēhe de nuū rī jeē cúmanī. Te jeē súcuan tu ní stáhān rī rohó, te ni ma sáha cuítī rī.

¹⁰ Te nájnūhun cúcáhnu vāha ni rī jeē jiní rī jnūhun ndaā Cristo, suni súcuan jíin rī jeē ma quihin ri xūhún nuū ni ñn ñayuu ní ndáñúū Acaya, návāha ma cási i jeē cúsi ni rī jeē súcuan-ni nacani ri jnūhun ya.

¹¹ ¿Te á síquī jeē tú manī rī jíin ró cúu jeē cahán rī súcuan, jéni ni rō, chí naún? Tuú chi máá Yaā Dios jiní yā jeē maní rī jíin ró jijnáhan ró.

¹² Te sáha ri ná-ni sáha ri, chi ma quihin ri xūhun ró, návāha cási rī nuū jeē casátéyí téē un máá de jeē cácahān de jeē ñnuú cásáha de jniñu ya jíin rí.

13 Te tēe ún chi nasūu apóstol ndaā cácuu de, chi máni máá jnúhun stáhú cácahān de, te cásáha de máá de jeē cácuu de apóstol Cristo.

14 Te tu náā ni yō jító yó jéē casáha de súcuan, chi je jíní yō jeē suni Satanás násama máá te stáhú jéē sáha máá nájnūhun ñn ndajéhé Yaā Dios jeē jíca jíín luz yā.

15 Te jeē yúcuan suni tu náā ni yō jító yó jéē tée cájejniñu nuū Satanás, cásáha de máá de jeē tée ndaā cácuu de. Te ñn quivī te nanihīn de siquī jniñu néé cásáha de.

Jnūndóho ni ndoho Pablo siquī jeē cúu de apóstol

16 Inga jínu cáhán rī jíín ró jeē ni ñn ró ma cáni ni rō jeē tée cánéé cúu rī. Te núu súcuan cájeni ni rō, te va cuatáhú nde ró jéē cahán rī nájnūhun tēe cánéé, návāha suni cuu cutéyí nde rī jecu nájnūhun cásáha tēe ún.

17 Jeē cahán rī vijna chi nasūu jéē ní ndacu máá Jítóho yō cúu, chi sa nájnūhun tēe cánéé cáhán rī jeē cutéyí nde rī.

18 Chi cuehē de cásátéyí de máá de modo jeē iyó ini ñayīví, te suni súcuan na sátéyí nde rī maá rí núu súcuan.

19 Te va tēe cáhīyo cájí xínī cácuu nde ró, te jeē yúcuan cúu vāha ni nde ró cuatáhú ró ñn tēe cánéé núu súcuan.

20 Chi va vāha-ni cájendeyí ni rō nuū tée un jéē casáfuerza de róhó cuajniñu ró núu de, chí cásáha de jeē ndundáhú ró, chí cáquende de ndajniñu ró, chí cásájehnu de máá de nuū rō, chí ndé cácatu de nuū rō.

21 Te vēsú cúcanu nde ri cahān rī, te na cāhān rī jeē tu ní cúnđeyí ni nde ri satéyí rí maá rí nájñūhun casáha tēe ún.

Te vijna te núu íyó sava tēe chúnđeyí ni de sátéyí de maá de, te va suni chundeyí ni nde maá rí núu súcuan. Te va cāhān rī nájñūhun cāhān ñn tēe cánéé.

22 Núu cácutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū.

23 Núu tēe cájejniñū nuū jnúhun Cristo cácuu de, te víhyá gā ruhū. Te va cāhān rī nájñūhun tēe cánéé jēe cutéyí rí súcuan. Chi ni caa ga ni sájniñū ri vēsú maá de jíjnáhan de, te ni caa ga ni cacani i ruhū, te cuehē gā jínu ni ine ri vecāa, te suni cuehē gā jínu ni cacani ñayuu cahni i ruhū.

24 Te jnáhan ri hebreo, uhūn jínu ni cacani xeēn de ruhū jíjn cuarta ññ, ñn cūhva jeē jé yajni cuu rī sáha.

25 Unī jínu ni cacani de ruhū jíjn yujnu xí, te ñn jínu ni cajēhe de yuū xinī rī. Unī jínu ni quēe barco jeē ní jica ri siquī jnúhun ya. Te ñn jecuāā jíjn ñn ndiáca ni yosō candá rí nuū cunú ndute mar.

26 Cuehē jínu ni ndoho ri ni jica ri ichi, te ni cācu ri nuū táca yúte, te ni cācu ri nuū táca ñácuñhá. Ni cācu ri nuū ñáyuu nación rī jíjn núu ñáyuu ñuu jícá. Ni cācu ri cháha chúcuan ná ni íyo ri ñuu jíjn rancho jíjn mar. Ni cācu ri nuū táca jnáhan ri jeē tu íyó ndāa.

27 Ni sájniñū nīhin ri te yí ní ndoho ri. Cuehē jínu ni jehni rī maá rí māhná. Ni jíj rī sōco, ni jichī rī ndute. Cuehē jínu ni íyo ndite ni rī, ni cuijnu rī, ni cumanī sahma ri

28 Te siquī táca jēe yáha chi íyó gá. Chi ndiquivī ndóho ri jeē nácani ndasí ni rī jehē táca grupo ñayuu

cácandíje.

²⁹ Núu ñn ñayuu tu fuerza ini i, te suni ndóho ri jehē i. Te núu ñn ñayuu quívi i cuēchi sáha jnáhan i, te ndóho ri jnūhun cúcanu jíin jnúhun náxeēn ni.

³⁰ Núu súcuan te núu cánuú cutéyí nde ri, te va cutéyí rí siquī tāca jéē steén jeē tú na fuerza ini rī.

³¹ Te Yaā Dios, Yaā cúu Tátá maá Jítóho yō Jesucristo, jíní yā jeē cahán ndaā rī. Te ní cáni na cáhán ñayuu jeē vāha ndasí Yaā cúu ya.

³² Ná ni Iyo ri ñuu Damasco, te gobernador jeē ndácu jniñu ndañúū jeē jnī rey Aretas, ni jeni de soldado ni cacondito tāca yéhyí jeē ní condúū ndihyú ñuu ún, chi jnī de ruhū quihīn rī vecā ni cuni de núú.

³³ Te ni quívi ri chīji ñn jīca, te ñayuu CÁCANDÍJE ni cascúun i ruhū ventana ñn vehe jeē néne jicā jeē ndihyú ñuu ún. Te súcuan ni cācu ri nuū téé ún.

Jeē ní jito ndijin Pablo jeē ni stúu ya nuū de

12

¹ Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítóho yō nuū rī te ni steén ndijin yā nuū rī.

² Jíní rī ñn tēe cándíje Cristo, te je ni cuu uxī cuūn cuiyā jeē ní sáha ya jeē ní caa tēe un ní jehēn de nde andiví únī. Te tu jíní rī núu ni jehēn rī jíin yiqui cúñu rī, chí ní jehēn anuá-ni ri. Máá Yaā Dios cúu jeē jíní.

³ Te jíní rī jeē ní ndonehen ya ruhū. Te á ní jehēn rī jíin yiqui cúñu rī, chí ní ndōo, tu jíní rī, chí máá-ni Yaā Dios cúu jeē jíní.

4 Chi ni sáha ya jeē ní caa ri ni jehēn rī nde jardín andiví. Te yūcuan ní jini sōho ri tāca jnūhun sāhí ndasí jēē ma cúu castūhun yóhó ñáyuu.

5 Te siquī jeē ni sáha ya sūcuan jíin rí cúu jeē cutéyí rí, te ma cutéyí rí siquī ndese cúu máá rí. Chi cutéyí rí máni jeē tú na fuerza ini rī.

6 Te núu cúní rī cutéyí rí siquī maá rí nuú, te nasūu jēē canéé rí núu sáha ri sūcuan núu, chi ndaā cúu jeē iyó jeē cutéyí rí. Te ni ma sáha ri, chi tu cúní rī jeē cani ni ñayuu jeē kujéhnú ga rī vēsú jeē ní jito i chí jēē ní jini i jnūhun ri.

7 Te tu cúní yā jeē yáha ri cutéyí rí siquī jeē ni stéén ndijin yā jniñu jéhnú ndasí un núu rī, te jeē yūcuan ni quiji ñn jnūndóho jeē ndiquín ruhū te stóho ruhū. Te ñn jeē ni jéhe ya jnūhun ni tají Satanás cúu, ñn jeē stóho ruhū, návāha ma yáha ri cutéyí rí.

8 Te unī jínu ni cahān ndahú rí jíin máá Jítoho yō jeē na téjiyo ya quihīn.

9 Te ni cahān yā jíin rí: Tuú chi tu cúmanī jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu sūcuan te cúsī ni rī jeē tú na fuerza ini rī, chi sūcuan te nducuehē gā fuerza Cristo ini rī.

10 Jeē yūcuan cúu jeē cúsī ni rī jeē tú na fuerza rī, jíin jēē cácahān ndevāha ñayuu jíin rí, jíin jēē cúmanī nuú rī, jíin jēē cájito xeēn i ruhū, jíin jēē ndóho ri jnūndóho siquī Cristo. Chi jeē tú na fuerza maá rí, yūcuan sáha jeē nihín rī fuerza maá yá.

Jeē nácani ni Pablo siquī ñayuu cácaandíje ñuu Corinto

11 Te va tēe cánéé cúu ri jeē ni sátéyí nde ri maá rí. Te siquī jeē tu cá candíje ró rúhū, jeē yúcuan ní satéyí rí maá rí. Chi cánuú jēē máá ró cuajnúhún ró ruhū nuú. Chi vēsú tú jniñu ri jeē maá rí, te va tu núu cuiṭi nde ri nuū tāca tēe un jēē cácahān rō jeē apóstol cujēhnu cácuu de.

12 Chi mēhñu ró ní sáha ri tācá jniñu jeē steén jeē cúu ndije ri apóstol. Chi jíin cuéhē paciencia ni sáha ri tācá jniñu jēhnu jeē steén poder Yaā Dios, jíin tāca jniñu jeē nahán ní canaa ni rō ni cajito ró.

13 Te tu ní sáha ri jeē núu ga cácuu ró núu tāca gá grupo ñayuu cá candíje, chi máá ñn-ni jeē tu ní stáhān rī rohó jēē cuáha ro jēē jíni ñúhún rí. Cone cáhnu ni rō núu súcuan ni sáha nde ri falta nuū rō víi.

14 Te vijna je íyó túhva ri jecondēhe rí rohó vuelta unī. Te suni tú na vé cacán rī nuū rō, chi nasúú ndajniñu ró cúu jeē cuní rī, chi sa suhva jeē quendōo vāha ró jíin jnúhun ya. Chi nájnūhun sēhe ri cácuu ró, te sēhe chi tu cánuú caya i jeē cúu tátá i, chi sa tátá cánuú cuāha de jeē quendōo vāha sēhe de.

15 Jeē yúcuan cúsiñ ni rī stíhi ri jeē névāha ri, te nde stíhi ri fuerza maá rí, návāha sáha ri jeē quendōo vāha ánuá rō jijnáhan ró. Te manī gā coo rī jíin ró, vēsú sanaa te jecu-ni cáhiyo manī rō jíin rí.

16 Te íyó jecu rō cácahān jeē vēsú tú na vé ni jíicán rī nuū rō, te tēe stáhú cúu ri, chi ni nducú rí modo ndichí nihīn rī xūhun ró, cácahān rō.

17 ¿A tāca tēe ní tají rí nuū rō, á ñn máá de ni stahú de róhó jēē nihín de xūhun ró cuu máá rí, chí naún? Tú cuiṭi.

18 Ni cahān ndahú rí jíin Tito jeē jécondēhé de

rohó, te ni tají rí ñn hermano ni jeē jín de. ¿Te chí ní stahú Tito rohó ní quihin de xūhun núū rō jeē cuu máá de, chí naún? Tuú chi ñnuú-ni casáha ndindúú rí, te ñn-ni ánuá ndindúú rí.

¹⁹ ¿Sanaa te cájeni ni rō jeē cahán rī jñūhun yáha návāha quendōo vāha ri jín ró, chí naún? Nasūu súcuan cúu, chí Yaā Dios jíní yā jeē cahán rī maá-ni jñūhun jeē cuní Cristo. Te ndihí jeē cahán rī chí ndúcú rí jeē ije ró jín jñūhun ya, ñání mání.

²⁰ Chí yúhú rí jeē núu na jéé rī, te sanaa te cuni rī jeē tu casáha ró jñiñu nújnahan ni rī. Te máá ró jijnáhan ró, suni ma nújnahan ni rō ruhū. Chí sanaa te cátejnáhan ró, cácuésún ni rō, cáquití ni rō, casándúxí ró, casájnúhún ró, cácahān rō siquī jnáhan ró, cácutéyí ró, cájica néé ró.

²¹ Te yúhú rí jeē núu na jéé tucu ri te cuāha Yaā Dios jñūhun canu nuū rī jeē súcuan casáha ró. Te sanaa te cucuíhyá ni rī núu íyó cuéhē rō jeē ní casáha cuēchi ichi yátá, te tu nácani ni rō stóo ró jñiñu jnéhén jñiñu jíca jnéni jín jñiñu néé ndasí ní casáha ró.

Saludo jín jñūhun cástūhun Pablo jeē sándihí

13

¹ Yáha cúu vuelta unī jeē jécondēhe rí rohó. Te sándaā yō jñiñu nájnūhun cáhán tutu: Jín jñūhun jeē cahán uū chí únī testigo te cundaā tācá jñiñu, áchí.

² Te vijna jeē íne jíca rí te cáhán tucu ri nájnūhun ni cahān rī ná ni ine ri jín ró. Cáhán rī nuū ñáyuu ni casáha cuēchi un jín núū ndihí ró, jeē núu na jéé tucu ri te ma cóo vītá ni rī jín ró.

³ Te yūcuán cuu prueba jeē cánducú ró, suu núu jendaá jeē cahán rī jín fuerza Cristo. Chi Cristo tu cúmanī fuerza yā jeē sándaā yā jín ró, chi stéén yā poder yā mēhñu ró.

⁴ Te vēsú tu ní stéén yā fuerza yā ná ni jihī yā jicā cruz, te vijna chi técu yā jín poder Yaā Dios. Te nájnūhun ni ndoho máá yá, sunī súcuan cándoho ri vijna jeē tu fuerza rī. Te vēsú súcuan te jín poder Yaā Dios cátecu rī jín yá jeē cuajníñu ri nuū rō jeē siquí jnūhun ya.

⁵ Coto ndee rō maá ró núu cáhīn nīhin ró jín jnūhun cácandíje ró yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndaā jeē ní cacandíje ndije ró?

⁶ Te ñūhun ni rī jeē sunī cáccacáhnu ni rō jeē maá rī cácandíje ndije ri.

⁷ Te cájicān tahu rī nuū Yaā Dios jeē ma sáha ró ni ñn jniñu néé. Te vēsú núu cuajnúhún ró jeē váha ndácu ri jniñu nuū rō, chí vēsú núu ma cuajnúhún ró, te tú na vé sáha, chi máni jeē na sáha ró jniñu ndaā cúu jeē cánducú rī.

⁸ Chi tu jésī ri nuū jniñu ndaā, chi sa suhva scáca ri.

⁹ Núu súcuan te cácusī ni rī núu tú na fuerza maá rī, te núu iyó fuerza maá ró. Te níni cácān tahu rī jeē na íje ga ni rō jijnáhan ró jín jnūhun ya.

¹⁰ Te tée ri carta yáha nuū rō nde ná tu jeē rī, návāha núu na jée rī te tuá jini ñūhún cuxeēn rī nuū rō. Chi ni jēhe Jitoho yō jniñu ndíso ri yāha jée sáha ri jeē íje ánuá rō jín jnūhun ya, nasūu jée snāā rī.

¹¹ Je ni cahān yō núu súcuan hermano, te na cóo jeē váha jín ró jijnáhan ró. Te na cóndihvī ni rō íje ró jín jnūhun ya, te coo ndeyí ni rō. Te na cóo ñnuú

ni rō te coyūcu mánī rō jín jnáhan ró. Te Yaā ndíso jnūhun ndeyí sñ ni jín jnúhun cundáhú ni, coo ya jín ró jijnáhan ró.

¹² Te jeē cahán rō jín táca jnáhan ró, te yíñúhún techūhu ró ndaha i.

¹³ Sándeyí ni rō jijnáhan ró, áchí hermano cácandíje jeē cáyūcu yáha.

¹⁴ Te ñúhun ni rī jeē Jítóho yō Jesucristo na sáha ga yā jeē váha róhó jijnáhan ró, te Yaā Dios cundáhú ni yā rohó, te Espíritu Santo condee cáhnu ya jín ró. Súcuan na cóo. Amén.

Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
9665e546-39d0-5bd5-8b10-38916a94951f